

HUI MIHI KI TE PIHOPA O WAIAPU.

NO te 20 o nga ra o Mei ka tae te Pihopa o Waiapu ki Ohinemutu. I waiho e ia tenei Ratapu mo te taha Maori anake. I Ohinemutu i te ata, i Te Whakarewarewa i te ahiahi. I te karakia i Ohinemutu 18 nga tangata i whakaungia. Ki tonu te whare-karakia i te tangata. Ko nga tangata i whakaungia no Te Awahou, no Ohinemutu, no te Pariha o Te Ngae, He nui te whakamiharo ki te pai o te karakia, te tapu, te ihiihi me te hohonu o te kauwhau a te Pihopa.

HUI KI A TUNOHOPU.

Ka mutu iho te karakia ka huri te iwi ki a Tunohopu. I reira te hakari whakanui mo tenei ra. Ko nga manuhiri ko Te Pihopa me tona hoa wahine, ko Mere Te Kahukiwi Scott o Porangahau, ko Pererika Peneti me tona hoa o Heretaunga. He tino hakari ta te Arawa i tenei ra. Neke atu i te 200 nga tangata i noho ki nga teepu kai. Kaore he kai a te pakeha i toe atu, apiti ki era kai ko nga kai rangatira nei, ko te koura ko te huahua.

Ka mutu te kai ka hui ki a Tunohopu. Ka tu atu nga kaumatua o Te Arawa ki te mihi ki te Pihopa. Ko te kupu nui i roto i nga mihi he whakawhetai ki te Pihopa mo tona kaha ki te tautoko haere i te kaupapa Pihopatanga mo te iwi Maori.

Ka mutu nga mihi ka tu mai a Taiporutu ki te whakahaere i nga take.

- (1) Kia tukuna e te Pihopa te mihi a te iwi Maori ki te Hinota Tianara mo ta ratou whakaaetanga i te tono a te iwi Maori i tetahi Pihopa mo ratou.
- (2) I Whakaputaina e Tai nga mihi a Te Arawa ki te Pihopa mo tona ngakau nui ki te kawehaere i te hiahia o te iwi Maori ki tetahi Pihopa mo ratou.
- (3) Mo te karakia whakawahi i te Pihopa i whakaatu a Tai ko te whakaaro o Te Arawa me whakawahi te Pihopa Maori ki Paihia, ki te wahi i tiaho tuatahi mai ai te maramatanga o te whakapono ki te iwi Maori, a ko Paihia hoki te nohanga tuatahitanga o Te Matenga, me nga Wiremu.

Ki te kore a Paihia, me mau ki te whare-karakia whakairo o Ngati Porou i Tikitiki. Ko Ta Apirana me Ngati Porou katoa kei te kaha rawa te awahina i te kaupapa e tu tika ai te Pihopatanga. He mea tika kia tukuna ma Ngati Porou te kupu mo te kainga hei whakawahinga i te Pihopa tuatahi.

Mehemea ka kitea he uaua te tae ki Tikitiki i te kino o nga huarahi, e whakaatu ana a Te Arawa, ko Ohinemutu te wahi kei waenganui o te Motu, he nui te whare-karakia, he nui hoki nga whare runanga mo nga manuhiri.